

Manfaat potensi ekonomi wilayah pacu pertumbuhan

Potensi ekonomi wilayah akan dimanfaatkan bagi merangsang pertumbuhan ekonomi serta mengelani ketidakseimbangan antara dan dalam wilayah, demikian menurut dokumen Rancangan Malaysia Ke-12 (RMK-12) yang dikeluarkan Unit Perancang Ekonomi (EPU).

Katanya, tumpuan akan diberi untuk mempercepatkan pembangunan berdasarkan nod pertumbuhan utama dan kawasan titik tumpuan, menarik pelaburan berkualiti dan mempertingkat kerjasama strategik dan penyelarasan.

Menurut dokumen itu, kerajaan juga akan meningkatkan kerjasama di bawah Segitiga Pertumbuhan Indonesia-Malaysia-Thailand (IMT-GT) dan Padanan Perniagaan Kawasan Pertumbuhan Timur ASEAN Brunei-Indonesia-Malaysia-Filipina (BIMP-EAGA).

"Pembangunan wilayah akan berpandukan kepada pembangu-

nan nod pertumbuhan utama dan kawasan titik pertumbuhan. Sehubungan itu, beberapa kegiatan ekonomi terpilih akan dipergiatkan di kawasan terbabit," menurut dokumen berkenaan.

Ia menambah, usaha akan ditumpukan untuk mempercepat pelaksanaan aktiviti yang mempunyai nilai tambah yang tinggi dan inisiatif pertumbuhan hijau yang seterusnya akan menyumbang kepada pertumbuhan ekonomi serta memastikan pembangunan wilayah yang inklusif.

Menurut dokumen itu, nod pertumbuhan utama akan dibangunkan di setiap wilayah sebagai hab aktiviti ekonomi bagi menggalakkan ekonomi bidaan, penggunaan sumber secara optimum dan mewujudkan ekosistem yang kondusif.

Ia menambah, setiap negeri akan terus memainkan peranan penting dalam pembangunan sosioekonomi bagi mencapai per-

tumbuhan yang lebih seimbang dan inklusif.

"Dalam hubungan ini, program pembangunan strategik pada peringkat wilayah dan negeri akan dilaksanakan melalui inisiatif yang dipacu oleh kerajaan negeri dan projek yang diterajui oleh sektor swasta," katanya.

Ia berkata, pembangunan perbandaran baharu yang diterajui pihak swasta termasuk Setia Fontaines di Pulau Pinang serta Seremas di Ampangan dan Rantau, Negeri Sembilan dijangka akan menyediakan lebih banyak peluang pekerjaan dan perniagaan.

Sementara itu, pemain industri khususnya perusahaan mikro, kecil dan sederhana (PMKS) di nod pertumbuhan utama dan kawasan titik tumpuan akan digalakkan untuk meningkatkan rantaian nilai dan menceburi aktiviti yang mempunyai nilai ditambah tinggi.

Menurut dokumen itu, usaha

akan dilaksanakan untuk memudahkan cara industri menguasai Dasar Revolusi Perindustrian Ke-4 dengan menerima teknologi, automasi dan inovasi, terutama dalam proses perindustrian kompleks.

Industri juga akan digalakkan melaksanakan inisiatif pertumbuhan hijau dengan menerima guna teknologi hijau dan amalan terbaik.

Sementara itu, dokumen menyatakan, langkah untuk menarik pelaburan berkualiti akan dipergiat, terutama di wilayah yang kurang membangun.

Tumpuan akan diberikan untuk menggalakkan aktiviti yang mempunyai nilai tambah yang tinggi, teknologi termaju dan berintensifkan pengetahuan serta mempergiatkan penyelidikan, pembangunan, pengkomersialan dan inovasi.

"Insentif ini akan meningkatkan produktiviti dan daya saing industri," menurutnya.

